

《無量壽經優婆提舍願生偈》 補充講表

◎附表十一：

○欲如實修行奢摩他故。（附表第十第5頁，即有之空。）

※《大乘起信論裂網疏》卷六云：「初學菩薩，已解一心真如、生滅二門，而修信行；但止觀力微，境緣粗惡，未入正定聚中，不能保其無退。故更示此勝異方便，令仗自心中之他佛，度脫佛心中之自身也。須知前止觀門，名念自佛三昧。今示念佛菩薩，即念他佛三昧。以念佛及菩薩，不生妄想分別，即是止行。

了知諸佛菩薩，有大神通巧便，能救拔我及諸眾生，即是觀行。」

※《占察善惡業報經義疏》卷下云：「從事入理，名奢摩他，即一心三止也。從體起用，名毘婆舍那，即一心三觀也。二皆名觀心者，皆有智慧照了故也。」

○成就不可思議力故。如彼摩尼如意寶性，相似相對法故。（以下糅合《往生論註》）

◆此中佛土不可思議，有二種力：一者業力，謂法藏菩薩出世善根大願業力所成。二者正覺阿彌陀法王善住持力所攝。此不可思議，如下十七種，一一相皆不可思議，至文當釋。如彼摩尼如意寶性，相似相對者，借彼摩尼如意寶性，示安樂佛土不可思議性也。相似相對者，彼寶珠力，求衣食者，能雨衣食等物。稱求者意，非是不求。彼佛土則不然，性滿足成就故，無所乏少。片取彼（寶）性為喻，故言相似相對。又彼寶但能與眾生衣食等願，不能與眾生無上道願；又彼寶但能與眾生一身願，不能與眾生無量身願。有如是等無量差別，故言相似。

○「佛慧明淨日，除世癡闇冥」故

※《佛說無量壽經》云：「設我得佛，十方無量不可思議諸佛世界眾生之類，蒙我光明觸其身者，身心柔軟，超過天人。若不爾者，不取正覺。」（第三十三願、蒙光柔軟）

○彼無量壽佛國土莊嚴，第一義諦妙境界相：次第說，應知。（以下糅合《往生論註》）

※《中論》·觀四諦品說：「諸佛依二諦，為眾生說法，一以世俗諦，二第一義諦。」

△三諦：真諦（真空）、俗諦（假有）、和中諦（中道第一義諦）。

※《圓覺經講義附親聞記》·辯音菩薩章云：「佛所說法，本只有真俗二諦。俗諦是事相上說，真諦是理性上說。俗諦在世間為真，出世則空。真諦在世間是空，出世則中。故空與中，有密切關係。了得空是不空，不空即中（第一義諦）。」

※《佛說阿彌陀經要解》云：「問：寂光惟理性，何得有此莊嚴？答：一一莊嚴全體理性，

一一理性具足莊嚴，方是諸佛究竟依果。若寂光不具勝妙五塵，何異偏真法性。」

◆是故觀彼淨土莊嚴功德成就，明彼淨土，是阿彌陀如來清淨本願無生之生，非如三有虛妄生也。何以言之？夫法性清淨，畢竟無生。言「生」者，是得生者之情耳。

◆淨土之宅，所謂十七句是也。十七句中，總別為二。初句是總相，所謂是清淨佛土，過三界道。彼過三界有何相？下十六種莊嚴功德成就相是也。

◆一者、量：究竟如虛空，廣大無邊際故。既知量，此量以何為本，是故觀性，性是本義。彼淨土，從正道大慈悲，出世善根生。既言出世善根，此善根生何等相，是故次觀莊嚴形相。既知形相，宜知形相何等體，是故次觀種種事。既知種種事，宜知種種事妙色，是故次觀妙色。既知妙色，此色有何觸，是故次觀觸。既知身觸，應知眼觸，是故次觀水、地、虛空莊嚴三事。既知眼觸，應知鼻觸，是故次觀衣華香薰。既知眼鼻等觸，須知離染，是故次觀佛慧明照。既知慧光淨力，宜知聲名遠近，是故次觀梵聲遠聞。既知聲名，宜知誰為增上，是故次觀主。既知有主，誰為主眷屬，是故次觀眷屬。既知眷屬，宜知此眷屬若為受用，是故次觀受用。既知受用，宜知此受用有難無難，是故次觀無諸難。既知無諸難，以何義故無諸難，是故次觀大義門。既知大義門，宜知大義門滿不滿，是故次觀所求滿足。復次，此十七句，非但釋疑；觀此十七種莊嚴成就，能生真實淨信，必定得生

彼安樂佛土。（以上糅合《往生論註》）